

Bolos asgaya nel Altu Sil

ROBERTO GONZÁLEZ-QUEVEDO

EL PASABOLOS

Ente los muitos xuegos que dende va mui bien de tiempu puen atopase nel Altu Sil ensin dulda destaca por demás el de los bolos. La variedá de bolos más propia d'estos valles yía la del *pasabolos*, que se paez a la que dalgunos chaman *bolu celta* ou, tamién, *bolos de Tinéu*.

Hai nos pueblos boleras agaya. Sicasi, una yía la principal, la que suel ser más estable, la que val pa las competiciones festivas más importantes. La muita afición de los mozos fai que nos pueblos haiga outras boleras pa usos más espontáneos. Ya, por supuestu, nas brañas tamién hai outras boleras, muitu bien feitas, pa los mozos ya los homes xugar ya xugar.

Los bolos son cousa de los homes. Mozos ya casaos son los que tienen el vezu de se poner a xugar cuandu

cuadra. A los guañes, por supuestu, présta-lls tamién abondu xugar en boleras feitas por ellos mesmos *ad hoc* ou enredar entrenándose na bolera de los mozos ya los paisanos.

Puen xugar individuos o equipos. Nos concursos suel xugase en plan individual mientras que nos xuegos normales suel faese por equipos. Los premios nos concursos son los trofeos qu'avezan a dase nas fiestas, pero nas partidas normales por equipos los que pierden son los que tienen que pagar la bébora pa tolos xugadores.

LA BOLERA

Na punta la bolera hai una piedra onde'l xugador pon los pías. A unos pasos d'esta piedra hai outra que yía una chábana. La chábana tien un maderu por delante pa por si pega aillí la bola ya, na mesma chábana yía onde se pon la filera de bolos. Los bolos son pequeninos, con una llargura de 15 centímetros ya con forma de prisma. L'anchura de los bolos yía de cuatro centímetros aprosimadamente. Ya son 20 los que se ponen bien xuntes enriba la chábana. Unos quince o veinte metros más allá de la chábana alcuéntrase la raya, que yía un duviachín de media cuarta de fondura.

Pero tolas boleras nun son iguales. Hailas, por exemplu, tamién en llugares emplunos. Nestos casos costa más caro pasar los bolos ya entós ponse la raya menos lluenxe ya, a lo mechor, xuégase tamién con menos bolos.

Las bolas ya los bolos tan feitos de rebollu ou carbachu. Sicasí, los de la braña suelen faese cona madera del xardón. Yía interesante'l feitu de que siempre foi muitu tradicional nas brañas que los brañeiros (mozos, nenos, paisanos ya viechos) pasaran muitu tiempu igualando bolas ya bolos pa dempués xugar a farta.

EL XUEGU

La cousa del xuegu yía da-llys fuerte a los bolos cona bola ya faelos pasar más allá de la raya. Ésta yía la primera xugada, dempués vien outra que se fai tirando la bola escontra los bolos dende la raya.

La puntuación del xuegu yía la que vien darréu:

1. Pa la primera xugada, que yía la de pegar a los bolos pa pasalos de la raya:

a) Cada bolu tiráu yía un puntu.

b) Cada bolu que pase la raya val diez puntos.

c) Nun cuentan los bolos que quedan de pía, ya los que pasan la raya valen namás diez puntos, nun suman el puntu de ser bolu tiráu.

d) Si la bola nun chega o nun pasa la raya, entós nun se suma tantu dengunu ya dizse que'l xugador *cuachóu*.

2. Pa la segunda xugada, que se chama *calmar* ou *tresbolar*, val un puntu cada bolu tiráu dende la raya.

Fai falta tener en cuenta que tamién cuacha'l xugador si la bola da na tierra antias que nos bolos de la chábana.

El xugador ou l'equipu que tira primeiru yía *la mano* ya dizse que tira *a marcar*. El que tira dempués dizse que tira *a borrar*. El primeru que tira *a marcar* decidese por sortéu con una moneda ou con una chabanina mochada por un llau ya dempués faense turnos alternativos. Si nun xuegu empátase a tantos, entós vuelve a tirar *la mano*. No xuegu por equipos tiran xuntos tolos componentes d'un equipu ya darréu los del outru.

XUGAR YA MÁS XUGAR

Los xugadores pasan muiitu tiempu xugando na bolera nos días santos ou cuando nun hai muiitu trabachu que faere. Pero nun son los xugadores los únicos protagonistas, porque tamién el públicu, los qu'amiran, participan a farta. Cuando un xugador cuacha oinse espresiones asgaya de censura ya comentarios chenos de burla ya d'ironía. La xente pasa horas ya horas amirando lo bien que xuegan unos ya lo muiito que cuachan outros. Outru tipu de bolos tien xugause tamién nesta zona, pero con muiitu menos raigañu ya afición tantu de xugadores comu de públicu. Yera'l casu d'un tipu de birle, que, por ciertu, yía un xuegu estremáu daféitu del pasabolos, porque los bolos son grandones ya nun fai falta pasalos de la raya.

Los buenos xugadores tienen muiitu prestixu ya en dalgunos casos el prestixu trespasa'l pueblu ya chega a outros llugares. Fai falta tener en cuenta que nun yía'l pueblu l'únicu espaciu de los bolos: mentóuse ya la braña, pero amás tiense la conciencia de qu'ésti yía un xuegu de más aquél xeográficu. Los xugadores de

Palacios del Sil, Llaciana ou Babia siempre fuenon polos concechos de Degaña ou Cangas del Narcea, onde dalgunos d'ellos fixénonse famosos.

EL XUEGU DE LOS HOMES

No xuegu que tamós describiendo del pasabolos yía importante por demás la potencia del xugador pa tirar muios bolos luenxe ya pasalos de la raya. Pero tamién esti xuegu tien el sou aquél de técnica: la postura pa garrar la bola, el dexase cayer al tirala escontra los bolos, el da-llys bien a los bolos pa que salgan pol aire, etc. Outramiente, na segunda xugada de *clamar* ou *tresbolar*, la técnica de pulsu ya puntería yía tamién de muita importancia.

Sicasí, el xuegu de bolos yía'l xuegu masculín por escelencia. Por supuestu qu'amás de los bolos había mui bien d'outros xuegos especializaos sexualmente nos homes. Por exemplu, xugóse tradicionalmente mui, polo xeneral nos días de fiestas dempués de la misa, a *la barra*, que faía falta tirar cuantu más luenxe mechor. Xugóuse tamién abondu al *tiragarrote*, garrando dous homes el mesmu palu ou estandochu a ver si unu llevantaba al outru del suelu onde taba sentáu. Comu yá se dixo, tamién hubo afición a outru tipu de bolos, una variante del birle. Pero comu xuegu ya deporte d'homes ensin dulda yía'l pasabolos el rei, el rasgu lúdicu más representativu del Altu Sil en xeneral ya, según nos paez a muios, el xuegu deportivu más enraigonáu nos territorios asturoccidentales. ♦

abstract

***THE GAME OF BOWLS IN THE
UPPER VALLEY OF THE RIVER SIL***

In the upper reaches of this valley, there is a variation of the games of bowls which has always enjoyed great support from the population of the region. The characteristics of this male-dominated sport are very similar to the type of game which is played in the west of Asturias.